

ŠENTENCIJA MESOPUSTA

POPANTANI

SUDAC: RENE ŠEVERDIJA – TESLA

ABUKAT: DANIEL GRBIĆ

AUTOR: RENE ŠEVERDIJA – TESLA

SUDAC

Bribir grade med dva brda
Frankopanska steno tvrda
Na prvo te mesto stavljani
I od srca ja pozdravljan

Pozdrav na prvoj stranici
Redon gre i twojoj dici
Simi ki žive va tebi
I ki minjali te nebi

Ni tebe ni običaja
Mesopusnog našeg kraja
Toj godišnje doba peto
Poduraloj ovo leto

Od Tri kralja do esada
Lipe nošnje i parada
Sakudare kampanaju
Pozdravlju i tancaju

Sad se ote na me srdit
Jer gren mesopustu sudit
Ufaju se v abukata
Ča njihova brani brata

Boje se dičica naši

Da te jutro morat k maši
Od kad sudin nisu bili
Nijednoga obranili

Narode moj ča si totu
Redon vas kušujen sprotu
Jel more bit još ki vani
Manje vas je nego lani

Općinaron pozdrav leti
To mij prvo na pameti
Novi krov i nova boja
A čaj nutri majko moja

Načelniku pozdrav veli
Dal bi on i našen seli
Ali ovdi ča tribaju
Zato naši ne glasaju

Nis to čul samo od njega
Bribirci su protiv sega
Greš ideju bilo čiju
Na otrovnu staneš zmiju

Sada problem nisu pare
Neg navike nika stare
Na čokovi lipo piše
Kako ovdi narod diše

Ja vlast našu neću falit
Ma se nen ni na nje žalit
Va seli od svetog Petra
Teškoj pišat proti vetra

Ne va prvoj neg va leru
Pozdrav gre i premijeru
Ošćuhal je ljudi mili
Škveri su ga ocidili

I Kolinda sej stesala
Dvajstdvi kile Bogu fala
Kad muški joj stane bliže
Pišarol se vajer diže

Zadnji pozdrav navoj maši
Za naši nogometari
Ki bi rekal Bože sveti
Da smo drugi na planeti

Mi se čini da od lani
Si smo redon "POPANTANI"
Ma jednomu tu se sudi
Gremo počet mili ljudi

TAMBUR

ABUKAT
Vodi vusta kladi sada
Ja bin otel nič reć rada
O poštenju nen niš pravit
Sih vas redon gren pozdravit

Ča ste malo s kuće zišli
Slušat bedastoće prišli
Volin kad smo ovdi skupa
Još nan zavo srce lupa

Ov sudac je stara bena
Od rojenja nepoštena
Mesopusta zač napada
Ne razumi ni parada

Kakovi su prišli dani
Nij zato kriv "POPANTANI"
Dokazat ču moj nebore
On je totu da pomore

Tužbaj ov put jako slaba
Razumi i stara baba
A kamo ja ljudi dragi
Ki san zanat pekal Hagi

Dokli tužbu nis zahitil
Dragih san se ljudi sitil
Ki su dalje ali moru
Pruže ruku i pomoru

Naša Katej tradicija
Kot i cela familija
Na koj strani su svemira
Ne odriču se Bribira

Nagrade nan zamotaju
Od srca za Bribir daju
Onda naše ili tuje
I krstari i putuje

I udruga i parada
Zafaljuju Kati sada
Ako bi do vlasti stigli
I spomenik bi joj digli

Još bin dobil tu po nosu
Da ne javin se i Rosu
Odrizat će prst i nokat
Da parada ima lokat

Brigaj starog kapetana
Daj parada nalokana
I za naši i za gosti
Fala Rosu vinaj dosti

Neka zdravlje ga posluži
Kletu da nan se pridruži
Da zahopsa s nošnjicami
Paradun i mačkarami

Novi tronbon majko moja
Lipi poklon od Hrvoja
I on zavoj još od rana
On i njegov otac Frana

Celin selon ki bi štopal
Harmonikuj Hrvoy sopal
Parada bez harmoniki
Kot i telo čaj bez tiki

Na tronbonu velo fala
Videla gaj cela sala
Kad va njega puhne Mile
Čut gaj zdolu na Povile

Spomenut se ovdi mora
Isto dragog nan sponzora
Donacija ne baš pića
Od Kamenka Antonića

Novi bubenji selon tresu
Kamenkoj odrišil kesu
Fala našen Merikanu
Čoviku i Kričinjanu

Mili ljudi z našeg kraja
Ča se site zavičaja
Parada vas jako voli
I za vaše zdravlje moli

TAMBUR

SUDAC
Samo gljedaš ki ti daje
Za narod te boli jaje
I za dicu ča su pići
Kot sardine va vrtići

Zbor građana bil je lani
Pokazal sej 'POPANTANI'
Bil je zbor da saki čuje
O dici se odlučuje

Koda jako ga zanima
Ki diteta svoga nima
Ča spi dite na diteti
I dva na kolenih teti

Harti su se na stol klale
Novi vrtić soldi fale
I mestišće još na se to
Pasat oće vraško leto

Da dozida se zagriži
Tamo da livada biži
Proračun je zato mali
Ča bi temelji koštali

Rešenje se jedno nudi
Ča te reć domaći ljudi
Da najmanje ovo boli
Vrtić vrnut staroj školi

Stavit vrtić i jaslice
Va prostori od knjižnice
Da ne bude veće brigi
Va općinu selit knjigi

Ma gospa ča tamo dela
Korbač je va ruki zela
Veli daj to velo blago
I narodu jako draga

Još sej v domi narod čudil
Konzervator sej probudil
Ista ona stara bena
Rad kej kula ostakljena

Zbor građana nisu zvali
Kad su gori staklo klali
Sada opet mrižu pletu
Da bu gore nan ditetu

I crikvi se već ne moli
Neg sluša o staroj školi
Na kafi se kašnje čuje
Ki to popa savjetuje

Tu ne krivin mesopusta
To nisu njegova usta
Ov mesopust veli selo
Ima zeru lipše telo

Kašnjej se to šlo na vijeće
Ma Bribirci tako neće
Isti oni narod zbori
Ča petnaest let već su gori

Ja drukčije na to gljedan
Zač je život samo jedan
Ako nisi stvoril valje
Vlak je makal puno dalje

Prvoj kokoš ili jaje
Pitanje za naraštaje
A jel knjiga ili dite
To pak pitat me ne smite

Nij bogatstva do diteta
Zato me to jako smeta
Nen prozivat ovaj žiri
Vele glavi va Bribiri

Ma podaci su se zneli
Neka znadu si va seli
Hiljadu i pol kvadrati
To su pusti kilovati

Djelatnica pazi na se
Tu se klimi i ne gase
Knjiguj diglo vavon leti
Troje dice Bože sveti

Mesopuste daj me smiri
Bil ni to da nij lektiri
Repliku nen navu temu
“POPANTANI” smo va semu

TAMBUR

ABUKAT

Nemoj se narođe čudit
Ako sucu pojdu sudit
Na zajiki nima dlaki
A va glavi dva lišnjaki

Nij čudo jer si trubila
Ča te žena ostavila
V dani sluša bedastoće
Kako hrčeš priko noće

Dobraj bila Bogu fala
I na vrime proglijedala
Ki bi trpel tvoje mani
Bolji joj je “POPANTANI”

Zavavik se na nič žalit
Tribij čagod i pofalit
Novi program je milina
A evropska gotovina

Ženi su se zaposlike
Ke su na biroji bile
Starijimi da pomoru
Ki već slabo stoje zgoru

Janja već ne konobari
Obilazi ljudi stari
Srcu dala si oduška
Pa po kućah gre i Duška

Teti Ani teti Mici
Ka god pojde i Štrkici
Starijen se lipo vidi
Kad uz šporhet sam ne sidi

Staro više nima brigi
Ako rabi nič z butigi
I trešćic nanese žena
A i kućaj pometena

Ne išći va jaji dlaku
Za pofalu ovoj saku
Ne moreš poželit drugo
Nego neka traje dugo

Pofalil se "POPANTANI"
Daj od centra gljedal plani
Bribir da bi se uredil
Ministar je to naredil

Toj njegovo obećanje
Kakoj posel neka žanje
Samo da se da mestiće
Zač fali parkirališće

Neće više bit nan gola
Vinodolska metropola
Klupe driva i fontane
Sača tu na Vrbu stane

Još samo da zračunaju
Kadi će bit škulja maju
Pa neka se krene kopat
Ili te i to zaštopat

TAMBUR

SUDAC

Od mozga tij zajik brži
A niš vodi ti ne drži
Žena te nij ostavila
Zač nij nikad s tobun bila

Da ti mlaje nij sestrice
Ne bi videl pumperice
Još uvik si sinko dragi
Za špekule i za jagi

Udovicu iščen belu
Pa s paradun gren po selu
Gre bandira gredu vile
Penziju zamrznul Mile

Lipi mladi popeglani
Isto ih je kot i lani
Kad va gosti gre ekipa
S nošnjicami slika lipa

Ovo leto se zamira
Ča delaju od Bribira
Pritužbi su na paradu
Po kućah gredu i kradu

Ne požeral više šuljki
Kij v Rošći ukral patuljki
Lišaji dobil po koži
Ki jej makal poli Joži

Lampa ča sviti na vrata
U drugoga fali brata
Neka reše kapetani
Tako san čul to od Frani

Da kletu zbog jednog tata
Parada ne kušne vrata
Do kućnoga je to odgoja
Povidel je Ivan Spoja

Drugi vikend doljnja strana
Tamo tri su kapetana
Nakon šest kuć mor ne žure
Kasne više već od ure

Propel nij pa da polete
Nete finit do desete
Običaj se stari bati
Va akciji opet tati

Prodelal je zanat stari
Pa se šutla po kamari
Armari se opiraju
Višalice prebiraju

Dva su gosta nutri bila
Kamera jej ulovila
Kašnjej bilo opravdanje
To ča išću da nij za nje

U ženi ča misi testa
Lanij bila i nevesta
Selo nižej odselila
Alij nošnju ostavila

Kako malu sada gladi
Jedan drugi od paradi
Nošnjica joj jako fali
Pa su fanti to iskali

TAMBUR

Ali vrime brzo leti
Izlazak je evo treti
Kosavin i dolnja strana
Minjalo sej kapetana

Malo kuć je zet te zalet
More bit se nete nalet
Još nij maša odzvonela
Već s prvoga zovu sela

Autore zabilježi
Belih gaćah niko leži
Na mobitel stižu snimki
Tamo poli Berezinki

Crikvenice gredu kola
Gljedaju pijana vola
Pred njimi daj pal kot klada
Staju ljudi a ča sada

Čovik žena i hčer mlaja
Da nisu z našega kraja
Ćel spasit budalu ovu
Hitnu pomoć sprotu zovu

Prija hitne z našeg sela
Evo Grbić Danijela
Poznan telo beni ove
Roko Ruži Kršulove

Hitna se tu pomoć pruža
A z domuj pritekla Ruža
Bolje da se još ne zbudi
Ako čaća mu poludi

Na nosila su ga klali
I va Riku otpeljali
Paradi se pijan voli
Više vozit karioli

Prvi put za petran Boga
Daj hitna prišla po koga
Još zapolne ljudi mili
Krvij imel tri promili

Jel to vino il rakija
Zacelil je kot i zmija
Nedilju će opet rada
Zač da k njemu gre parada

Opet na dno Poduljina
Popustilaj disciplina
Slaninaj bila na kuki
Osušile mu se ruki

Par starijih zada piva
I poštено se naliva
Fotograf je stigal z Riki
Ovo te bit prave sliki

Sama živi teta Maca
Na stolij kolačih taca
Nij rojena vavon kraji
Ali voli običaji

U Toni i babi Kati
Pijano se telo klati
Gemišt grdo gaj pokosil
Tataj nigda poštu nosil

Ki sramoti trobojnice
Pa gre ukrast u starice
Da Bog dobil salmonelu
I sračku i trihinelu

Prehitilo gaj na kipu
Uspel je zagrlit pipu
Koda da ugostiš slona
Odvalil juj od betona

Udruga daj kašnje bila
Ženi štetu namirila
Krivca neka se zapira
Zauvik s paradi stira

Kašnje još sej razglabalo
Daj lipila bilo malo
Samo dvi tri lopatice
Čaj preteklo od grobnice

Štalah nisu niš ukrali
Zač su Radu ponašali
Slikaj lipša mi se čini
Na Graci i Dragaljini

TAMBUR
ABUKAT
Ovo nisu dičji vici
Gren zaturan do Marici
Povidit ču ča sej bilo
Dragoj ženi dogodilo

Obajdu ju njena dica
Zač je z davni udovica
Kad zaškuri stara dama
Va postilju pojde sama

Finil dnevnik sapunica
Na počinak gre Marica
Pravi to još i esada
Daj zaspala kot i klada

Sul na petri bili duhi
Ili jako veli puhi
Jel od Boga to poruka
Poklopil juj komad štuka

Par štuketih popustilo
I Maricu poklopilo
Žoknulo juj posrid čela
Skoroj pukla na dva dela

Prova stat se mili Bože
A kamara joj se vože
Sej zvezdice pobrojila
Dokli sej ohovistila

Hitnu pomoć zove žena
Glavina mij razbijena
Jel bil potres il ča drugo
Nemojte da čekan dugo

Nij otela zvat dičinu
Škuroj neka još počinu
Oće kad ju pregljedaju
I glavu joj zamotaju

Héri moja pridi pome
Ja san ti na hitnoj bome
Va sni mi sej to trefilo
S plafona mej poklopilo

TAMBUR

SUDAC
Nisu to zidali čera
Dva Bribirska volontera
Inžinjeri su po struki
Ča reć nego zlatne ruki

To sej mislin lani bilo
Na Ćokovi dogodilo
Voja da jej angažiral
Skupa šnjimi betoniral

Od početka tribij krenut
Pa ču prvo to spomenut
Va Vojinoj sportskoj zoni
Dela se na slačioni

Prvo struja da se spelja
To Markelić oće Želja
Zagipsal je bil bužiri
Još škatule paj na miri

Gipsaj bil potrošil malo
Još pol vriće muj ostalo
Betonaža nutri vani
To te klupske veterani

Voja zibral stari asi
Prvaci va svojoj klasi
Jožuj zibral ti ne seri
Ali neće on bez Jeri

Ki Jožu ne zna od prija
Špicnamet muj pića zmija
Materijal da se fini
Ciment voda pesak fini

Za lipogaj bilo dana
Mišalicaj uštekana
Delo sada more počet
I cement je evo načet

Mišat ote tri na jedan
Takoj beton jače vredan
Ov načeti ča su zeli
Čudan niki ciment beli

To nič jako brzo veže
S otin bit će delat teže
Dodaj šlauf simo hodi
Ovdi fali puno vodi

Toče koda gori kuća
A nutri se veća buća
Puši z one mišalice
Moreš gljedat z japnenice

Dimeloj to moj narode
Selo misli naši vode
Ne pomaže vodi brenta
Nutrij gips mesto cimenta

Nisu mi na znanje dali
Kako su to odštemali
"POPANTANI" dokaz čvrsti
Totuj bil umišal prsti

Za zidarih još poruka
Delajte ča van je struka
Brojke slova Bogu fala
To delaju još od mala

TAMBUR

ABUKAT

Smiluj mi se Bože sveti
Ovoj bilo lani v leti
Naš narod se kupat voli
Na Bribirskoj tamo doli

Lončarić je doli Sreće
On banju propustit neće
Tako brže cele rani
Misec dan daj bil Lovrani

Biserka mij rekla žena
Radi livoga kolena
Sa kolena i si kuki
Jel ča tuje i va ruki

Dočin mlado doktorira
Na Srećku se prakticira
I doktori i statisti
Za Srećka ne vrede listi

Za hodit mu štaka triba
Maj va mori kot i riba
Stari meštar od šporheta
Nij te žegi ka mu smeta

Šnjin san bil u Marijanki
Za stolon a ne na šanki
Klizi koda ki ju riva
S krigljina studena piva

Da kompletna bude slika
Oliver je tu i Dika
Piva prva druga peta
I briškula i trešeta

Popila sej već i putna
Slika sada malo mutna
Redon nas je zelo malo
Srećkaj doma otpeljalo

Neće smetat baku Biku
Ona beći TV sliku
Za vičeru nič će smišat
Ali prvo da gre pišat

Brzoj nužda mu presela
Zač je školjka šajtrug zela
Pal je školjku na zahodu
A već je potegal vodu

Ne gre sad oblačit robi
Gre pri štaki do konobi
Dolij šahta suzo slana
U pokojnoga Picana

Bika još va TV škilji
Misli Srećkoj va postilji
A on se pak Bogu moli
Jel šajtrug va šahti doli

Bolje da se njij doznalo
Zač ovo mij teško palo
Već je šahtu zgrabil v ruki
Maj puklo va jednon kuki

Kuk je zletel moj ne bore
Zove kože se ne more
Kuk je desni druga strana
Od kolena koj još rana

Boli koti da ga kolju
Nazad zgoru ima volju
Neće rulit jer je greda
Gosti spidu u suseda

Penje se va grdih mukah
Po guzici i po rukah
Presel film je baki Biki
Kad hodnikij čula kriki

Dvi hitne pred svitlo danje
Voz Srećka na štelanje
Čin je čula petešića
Bika zove Plovanića

Očrafal je školjku sprotu
I šajtrug se našal totu
Dvi tri kuni va patenti
I si vražji dokumenti

Već zapolne si Picani
U tati su va Lovrani
Reklaj sestra to zapiši
Da zdrastvena čudno diši

TAMBUR

SUDAC

Hotel opri za stanari
Zada doma va pekari
Mark Amsterdam ki ga znate
Otplaćuje to na rate

To mij baš povidel čera
Išće recepcionera
Sezona gre pa nij miran
Zač da već je fanj bukiran

Hoteli su nova moda
Bez poneštar i zahoda
Uspomeni nosiš lipe
Bez postilje i bez pipe

Pokazal mij "POPANTANI"
Kadi živi Popetljani
Priselil je na ta vrata
Da bu bliže svoga brata

Va Bufeti se umiva
Za doručak vela piva
Dal ča tvrdo poj zbilja
Od kad sej vrnula Dilja

Petnajstak piv da popije
Manje more nego prije
Nima i bez da ga cipe
Ni upale a ni gripe

Takov se ne rodi često
Simbol je za ovo mesto
Povist gre od Frankopana
Do Marinka Amsterdama

Kurikul se spravlja puče
Da dica o njemu uče
Kako živi ta trubila
Četrdeset let bez jila

TAMBUR

Od Bribira do Afriki
"POPANTANE" se su tiki
Čini mi se prave koda
Dicu već ne nosi roda

Dva muški te imit dite
Jel to pravo prosudite
Pa da školi dica pišu
Moja mama ima pišu

Škverske da su škure sliki
Va Maji i Uljaniki
Strateški se partner išće
Za škver ne za kupališće

Sindikat se grdo bori
Plenkoviću daj pomori
Nij važno ča mesto sedan
Tu načine brodić jedan

Todorića smo vrnuli
Mamić v Bosni nula k nuli
Soli na rep kladi zeru
Još se sudi Sanaderu

Lažne sliki SMS-i
Tajna službo se pretresi
Sul stvarno uz dupljak vina
Ministar i kurbetina

Kolinda se zaletela
Da nij tako zamislela
Za dom spremni jel to pravo
Kot i ako rečeš zdravo

Precjednička opet lenta
Vabi Ivu dirigenta
Na livon se isto boki
Z naftalina vadi Zoki

Pernaru da to priliči
Limunadun gripu liči
Upala pluć Bože sveti
Mljačna voda bez tabletii

Kupili smo prodat nete
Avioni ča ne lete
Provizijaj bila mala
Pa Merika rekla fala

Severinaj gaće sukla
Stara kula dres obukla
Igrali su dečki mladi
U Putina gori Vladi

Kolinda jej kuševala
A nacija dočekala
Pivali su s nami oni
Marku gase mikrofoni

Časne za lik travu sade
Kardinali dicu glade
Grdaj kaša zamišana
Za kurdi u Erdoganu

Boduli te van z Evropi
Dal i gori jebu popi
Grešil plakat il se kidat
Tramp da oće zid zazidat

Termometar da se penje
Gre globalno zatopljenje
Debela rit ne veruje
Afriki se još gladuje

Bribiri su Bože sveti
Šest put vajer prošle smeti
Z Ivanja su prišle liste
Da nas baren i očiste

V goru neć po jagodice
Da ne trefiš izbjeglice
Gorij studen i nij vruće
Provaljuje se va kuće

Da se krade na debelo
Ma ne laje pas za selo
Sul pokrali to migranti
Ili pak domaći fanti

Ča v novinah se pročitaš
Kij normalan pa se pitaš
Sestra sestru ne spominji
Dvajset let drži va škrinji

Ludo ovdi ludo vani
A platit gre "POPANTANI"
Kapetane sablju simo
Da ov divan mi finimo

(UDARAC SABLJUN)

OSTAVINA

ABUKAT

Nij gotova procedura
Žalit ču se do Štraazbura
Sudu čaj za ljudska prava
Zač je ova pala glava

Odštetu ču iskat velu
Zbrinut mu obitelj celu
Naplatit ču svoju muku
Sad gren čitat oporuku

Udrugi ča ovo bati
Korbač da se kazne tati
Za patuljki i slaninu
Načrnit in guzičinu

Leo neka dekret piše
Ki nete paradu više
Precjedniku zač on voli
Šesnaest litra koka-koli

Ne znaš ni ti stara mulo
Jel dozvolu mu vrnulo
Va odbori ajme meni
Samo dva su oženjeni

Drugimi daj samo srkat
I ruka da moru drkat
Ostavlja in "POPANTANI"
Tri lutki na otomani

Sastanak te finit prije
Onda lipo na orgije
Konpresoron za baloni
Lutki te napuhat oni

Kapetanih isto snima
Nijedan divočki nima
Muziku gren malo stišat
Miš ne služi tek za pišat

Kapelniku našen Mili
Dedi još su svedočili
Sada vnučad gre po cisti
Pita jel to još on isti

Visoko muj digal palac
I od lilka dal fikalac
Još postoli mili druže
Da se opet ne pofuže

Za paradu i nošnjice
Same redon pofalnice
Njimi želi samo sriću
I travi za motat vriću

Sitila se stara bena
Prijatelja svog Lepena
Na njega se on ne jadi
Najbolji muj va paradi

Ostavlja mu tako mora
Novi parfem od Diora
Toj kupljeno ne oteto
Neka dahne celo leto

Autoru ča to piše
Jedan bronhi da ne kiše
I divojku jednu mlaju
Zač je ljubav prišla kraju

Faljen Isus i Marija
Ne smeta i ka starija
Na leta se on ne buni
Samo daj ča na računi

TAMBUR

-37-

Ostavil je načelniku
Isto ča i zamjeniku
Prnesli ste soldih vriću
A Bibiri rog za sviću

Povidel mij tetac Frana
Triblji vrtić i dvorana
A Bibiri prazna kola
Par žlipcih i dva jupola

Načelnikuj tu ostavil
Uru ali nij ju navil
Poručil muj ovdi jasno
Za dvi leta bit će kasno

Ostavina za si puti
Kud ne moreš već s auti
Manje daža lipa fala
Nij propusta ni konala

Ovoj briga jedna vela
Nećeš moć kroz naša sela
Jel rešenje va žičari
Od Slipice do Barbari

-38-

“POPANTANOГ“ kavalira

Brine i frizerka Mira

Mirovina daj premala

Pa sej bila razmahala

Mesopust joj tu ostavlja

Samo šaku dobra zdravlja

Karanfil o osmon marti

Da čote joj tuje harti

TAMBUR

Ovdi oću malo zastat

Štrkicuj otela nastat

Nosi obed majki Mici

Isto tako i Štrkici

Misli ju dogljedat Mira

Etoj kuća srid Bribira

Ne pomišlja frizer dama

Va biznisi da njij sama

Druga gospa tu z Bribira

Oće isto ča i Mira

Pravni jezik ona zbori

V rukah nosi ugovori

Na prehrani lipa fala

Kratkaj Mira tu ostala

Sad u hćere ženi frka

Ni ne pita kakoj Štrka.

SUDAC

Sitil sej na dva gorštaka

Na Antonca i Tićaka

Dva punjača kalač struje

Kad migrantih se ščekuje

Snalaze se ti bećari

Čaša vodi tri dolari

A deset je tretman celi

Ako pune mobiteli

Prošli su kroz život dosti

I sami su često gosti

Oprta su u njih vrata

Za migranta i za tata

Poli Želji i Ivice

Hotel je za izbjeglice

Potirana s rodnog praga

Ta čeljad je njimi draga

S Alana i Viševice

Spuštaju se izbjeglice

Zemljovidi tri su znaka

Kako ote do Tićaka

Črn je malo na nje hita

Spas va ovon delu svita

Rukami se onda maše

Toj zajik ča simi paše

Šćuđuju se dva pajdaša

Krvna slika nij kot naša

Čin se jadni ljudi griju

Nete vino ni rakiju

Mudar savjet goston daju

Neka paze kamo staju

Nek biže kad spaze čeku

Da ne nalete na Kleku

Zač je onda više-manje

Završilo putovanje

Zaboravi na Milano

Nazad v žicu moja rano

TAMBUR

Spred civilih i dičice

Fala Zubi za se pizza

Ma sej sitil "POPANTANI"

Onoga čaj bilo lani

Bez stranic mu daje knjigu

O adventi za nu figu

Pisloj na srid Bribira

Da i Zube sponzorira

Ćil dat plina stavka mala

Odgovor je neću fala

Doznalo sej vidi vraže

Treće leto rogi kaže

Ne zamiran puno njemu

Saki dela po svojemu

Kletu kad se advent bati

Neće ga bit na plakati

Skuhalo sej i bež njega

Vina gulaša i sega

A za Vrbu i Bufetić

Medalja i jedan cvetić

TAMBUR

-42-

ABUKAT

Na tanci se vraćan malo

Bože ali sej tancalo

Već deset let da nij tako

Potvrdit to more sako

Zadnja želja svit nek čuje

Da Tamaru zikušuje

Sej od sebe žena dala

Bogami sej nadelala

Ona mat joj i svekrva

Mesopust je ljubav prva

I ženi ča konobare

Se bi dale za mačkare

Željaj još pred celin selon

Da kletu nastavi s delon

Neka hopsa cela sala

I pametan i budala

Tuj i lampa daj ne seri

Za slikanje na jezeri

Ta se dvojac poznat oće

Slika žabi o pol noće

Mesopuste mor nis bena

Oni nisu muž i žena

S otun lampun ti ne žuri

Neka slikaju va škuri

Još je tu nič za ni kusi

Prezimenon ča su Tusi

Ako pilami ne krule

Onda okol maja tule

Već od šeste čuješ pili

Na Pilani i perili

Pilotina lipo frca

I doli spod Okoprca

To tržište da diktira

Peljaju i van Bribira

Nij jeftino moj Milane

Petsto kuna su cipane

Samo Davor neće pili

On je više za sopili

Za berdu i harmoniku

I zapivat onu niku

O Božići daj to bilo
Na polnoćku sej hodilo
Već njij trezan Bože sveti
Sviralo sej va bufeti

Marijan Mica i Mika
I Davor i harmonika
Pa si skupa moja lolo
Na Vrbi opleli kolo

Nastavak je iza maše
K autoru komu paše
Ka sej litra tu rešila
Stiže Davor do perila

Auti gredu i busi
Tancaju na Vrbi Tusi
Šut je š njimi moj nebore
Valjda pismu da pomore

Pa na vrh Štal okol maja
Piva pismi ovog kraja
Upotpunit oće sliku
Doma gre po harmoniku

Ostavlja in "POPANTANI"
Bači vina od preklani
I jabukav prikolica
Da pitu omisi Mica

Sretan Božić selo moje
To ti želi dite tvoje
Precjednik je od odbora
I selo ga slušat mora

Još je drofih par ostalo
To da nij još pokuhalo
Ostavina daj to pića
Za Mehu i dva Jurčića

Celi dan sej odužilo
Jel se Bože ča pojilo
Onda cela familija
Gre Poduljin do Darija

Starin ljuden još ostavlja
Pleten košić čaj pun zdravlja
Dvi tri kuni va dekreti
Toj da moru platit smeti

Na vu stranu to nij stalo
Jel još koga ča zapalo
Hote hitit čagod v usta
I molit za mesopusta

“POPANTANI” mili brate
Dušicu gren važgat za te
Ako se bun mogal klatit
Jutro ču te i otpratit

TAMBUR

UDRUGA ZA MESOPUSNE OBIČAJE BRIBIR ZAHVALUJE
SVIM SPONZORIMA A POSEBNO:
NARODU BRIBIRA
OPĆINI VINODOLSKOJ
ŽUPANIJI PRIMORSKO GORANSKOJ
IVICI ROSU
AGENCIJI KATARINA LINE OPATIJA vl. KATARINA
HAUPTFELD
KAMENKU ANTONIĆU
KTD VODOVOD ŽRNOVNICA